



Magdalena Martullo-Blocher ha menziunà a la conferenza da medias da venderdi passà era ina innovaziun, nua che la Ems-Chemie è participada – numnadamain uregliers che transmettan il tun sur l'ossa e betg direct sur l'ureglia.

FOTO SOMEDIA

«Nus investin a Domat – il lieu da produenziun è bun»

L'emprim mez onn 2021 ha purtà in resultat da gestiun ed ina svieuta da record en l'istorgia da 85 onns da la Ems-Chemie. A medem temp sviluppa il concern novs products, per exempel elements per autos electricis. L'aziunaria da maiorità e delegada dal cussegl administrativ Magdalena Martullo-Blocher ha pretendì da la Confederaziun mesiras urgentas per garantir il provediment d'energia per la Svizra.

MARTIN GABRIEL/FMR

La Ems-Chemie saja dapi passa in onn neutra-la areguard il CO₂, ha Magdalena Martullo-Blocher ditg venderdi passà a chaschun da la conferenza da medias semestrala da l'interpresa. L'energia idraulica generada en Svizra garantisce bain ina part dal provediment. Quai na tanschia dentant mai, uschia Magdalena Martullo-Blocher: «En princip duvrassan nus in'ovra atomara supplementara en Svizra per satisfacer als basegns d'energia netta. Ma quai na va betg, perquai che la nova lescha d'energia scumonda implants atomars.» A partir dal 2030 vegnia difficil da proveder la Svizra sufficientamain cun energia netta, ha Magdalena Martullo-Blocher ditg: «L'energia da vent e l'energia solara na tanschan betg per cuvrir ils basegns». A l'adressa dal Cussegl federal ha l'interprendidra e cussegliera naziunala perquai appellà da far remadura pertutgant la strategia d'energia 2050, uschiglio crodia la Svizra garanti en ina largia cun stgarsezza d'energia.

Facturs dal lieu

Magdalena Martullo-Blocher ha pudì preschentar venderdi a las medias in excellent emprim mez onn da svieuta e da gestiun (guarda boxa). «Il lieu da produenziun a Domat è adina fitg impurtant, ma dasperas cuntan-

«54% da las taglias pajain nus en Svizra.»

Magdalena Martullo-Blocher,
Ems-Chemie

schain nus buns resultats da produenziun en 15 ulteriurs pajais dal mund, tranter auter era en la China ed en l'America. 54% da las taglias pajain nus dentant en Svizra.» Sco buns facturs politic-economicos en Svizra per la Ems-Chemie ha la vicepresidenta dal cussegl d'administraziun era numnà las forzas da lavur qualificadas e la segirezza dal provediment d'energia.

Situaziun economica fitg dinamica

«Nus avain quintà cun in progress en l'emprima mesadad da l'onn 2021», ha Magdalena Martullo-Blocher ditg. «Sunter l'onn da pandemia 2020 è la conjuntura mundiala sa restabilda visibilmente. Tar la vendita sa mussa quai surtut en la China.

La Ems-Chemie haja pudì tegnair sidretg l'entira produenziun er durant l'onn da pandemia 2020.» Perquai possian tuttas societads dal concern furnir er ussa, en in temp che las materias primas sajan stgarsas.

Spetgas positivas e novas investiziuns a Domat

A l'ur da la conferenza da bilantscha ha la Ems-Chemie envidà a la preschentaaziun da novs products. Tar ils favurits per la fatschenta tutgan elements per stabilisar las battarias dals autos electricis, truclas per segiranzas ed in ureglia da materia sintetica che transmetta il tun sur l'ossa da la chavazza, uschia che l'ureglia resta libra. L'innovaziun e la strategia da las spezialitads sajan era in garant ch'il bun onn da gestiun cuntinueschia, ha la scheffa da la EMS-Chemie concludì: «Per tegnair pass a la dumonda dal martgà vegnin nus ad investir a Domat 300 milliuns francs en ils proxims tshintg onns, per schlargiar las capacitads dal lieu da produenziun.»



In'egliada sin l'areal da la Ems-Chemie.

FOTO OLIVIA AEBLI-ITEM

Dapli gudogn e svieuta

La svieuta da la Grupa Ems-Chemie cun il sez principal a Domat e creschida l'emprim mez onn 2021 per bunamain 38% sin 1166 milliuns francs. Creschi marcantamain è er il resultat da gestiun per 42% sin 321 milliuns francs. La Ems-Chemie ha cuntanschì quests resultats sin ils secturs da fatschenta mundials cun polimers d'alta tecnologia e cun chemicalias spezialas. (fmr/mg)